

四庫全書

經部

欽定四庫全書

讀易餘言卷二

明 崔銑 撰

下經卦畧

咸

非本情無以動物咸則加心而名感有私意無以宰物感則去心而名咸雲龍風虎不期而至磁針珀芥無約而交冥理自然莫之知其原也人則私心妄合

鮮不失其情以賢助賢猶病其朋況於邪僻乎

下卦感之淺五上感之末卦體止者靜可也卦體說者貞可也心動而後足行拇徒志於四欲動未成腓上屬於股下連於足故居則得其本體而吉從初則凶股隨腓而動欲止不得何也感主於心百體從之爾主不役動將何為四當心位而貞貞者虛中无我之謂若上係於五下係於三朋比之急而大公是背所得者狹矣何以爲貞乎五為梅核感上上以頰舌

感五末甚矣此六爻不取應而取比盖咸速也

拇腓股義取下體盖言无感入之道者勞而无成
輔古義取上體盖言无感入之實者煩而无益
四為心心通萬變出令而非受令應物而不留物苟明屈
信之自然貫物我為一體所謂聖人感人心而天下
和平即天地感而萬物化生者朋亡不足言矣

晦一曰背肉也殊與爻象不合盖艮言止可取諸背
咸言感所取皆動物拇而腓而股而心而喉之晦口

之頰舌自下而上自末而顛有次序皆運用也

凡人將行未行則拇自振搖將言未言則喉中宛轉
拇者動腓股之漸晦者鼓頰舌之先

恒

恒有三善亨也无咎也利貞也傳曰久於其道也其
者每事之當然也利有攸往權之運也夫恒者可常
斯久或進或止或張或弛固非苦節艱限專而株守
者也事君以道合則匪躬違則潔已交友以直聽則

用忠疏則全交協情中理恥辱不逮百代不易之法
故曰終則有始也言應變無窮也初之无利三之羞上
之凶過而失之也久於其道日以浸深體巽務入
始而求之三位重剛卦本柔遜其志不一上居動極
而振何施而可故曰過而失之也二之悔四之田五
之凶泥而失之也二剛在下失恒道也以居中僅得
悔亡四居臣位无德當之施政則道不敷撫民則澤
不下九五至尊所宜流通仁義運天下於掌上而執

一道守一方可乎故曰泥而失之也然則盡恒者其
惟聖人乎日月得天而能久照四時變化而能久成
聖人明如日月制用如四時故曰天下化成矣

久於其道為恒道者中而已矣垣而非徑也遠而非
險也中庸不可能也故恒之六爻無善詞

遯

遯者逃內之外也王弼曰柔長故剛遯是也亨者四
陽也當遯而去不制於陰小利貞者二陰也本卦為

貞之卦為悔戒其勿變以通陽也

初六在下故曰遯尾四陽尚盛陰敵之則危戒其止而勿往六二陰又浸長執用牛革欲其留而勿進九三係遯位連也謂比二陰九四好遯情洽也謂應初九五嘉遯好速也謂二五正應上九絕遠於外亡陰之疑肥謂饒裕也

一曰三為賢人六二見三將避已而去心願執而留之是用其中順之道以革時者

畜臣妾吉三與二比三若畜二如制臣妾則上三陽
安其位否則否而至剥矣然非能宣暢剛大殞落羣
小故曰不可大事也一曰下附二陰不任以權如剥
之以宮人寵也

或曰小人可為之謀與曰小人心奸性狠然畏罪避
害相時順動亦猶人耳彼安肯妄為遂取殞滅之禍
若盆成括之類小人之愚騷者不足道也故古有佞
於惰而忠於唐者況遜之君子猶盛乎

大壯

四陽盛長小道將滅聖人喜之名曰大壯陽壯輕敵
陰窮深謀聖人憂之抑其太過

陽盛固天道之復用壯非君子之常得時得位不違
謙則吉九二九四以陽居陰則吉九三過剛而觸藩
况上六六五以弱據強何利之有

易疆畔也四乃上卦之初之象大壯者用壯以濟時
五居位體柔失其壯矣言陽進至四而五失之也中

以自守不能闡揚剛德弘濟生民但无悔而已

大壯之五不美者不稱其位也若乾之五則利見也大壯之五比二陰夬之五比上所謂憂在腹心變生肘腋下之諸臣宜用艱危也

藩皆謂上六也上六又言用壯之過至終不變凡亂之生由小人也凡陽之進決小人也陰性暗陽性明小人深謀而難測君子直道而多疎故常受反噬之禍而憂及宗社故壯夬多危詞嗚呼遠矣哉

晉

晉進也日出地中進進而麗于中天也大明在上羣陰順之然所惡於九四者為其間也據位擅權奪君之與幸有五之明不敢顯著貪食畏人便則動厲則縮碩鼠之類焉故初則摧二則愁然君子安於下志於上豈可回心貶行妄附強援故皆曰貞吉摧者位也不得進則守貞罔孚者德也不見信則惟裕履順於正立誠於闇不涉邪偽无愧神明至幽王母將來

福之矣

升卦三二之升四曰虛邑履乎陰也晉卦初二之遇四曰鼫鼠阻于陽也四位不當是邪德也然上有大明焉能遏三陰之附乎

四得竊高位六五烏在其為明乎曰知人則哲惟帝其難之昔帝問登庸共兕被薦若非命揚側陋則舜且攸伏不聞然有帝如堯彼九四者行放之矣

問曰初六六二其賢者與答曰執柔履順上附大明

非賢而何專志在君不他應也初未受命二始有位
三為一卦之首率其類升人三為衆非四能間矣
悔亡者求免咎於已勿恤者不責得於人德未至者
煩於物內无止者荒於外退而修德因壘而降動而
勤略雖盟而抗自明者能照奸用察者常受蔽王伯
之辯遠闇之幾也

明夷

日本在天其明乃光入于地中明之傷也聖人君子

有明德而遭亂世抑下位則宜艱苦自守不可附匪人與國事也

上六傷明者而卒自傷紂之焚于臺也初九飛而垂翼君子剛德不回時忌特深然位下事微舍爵祿而速去之微子是也六二曰左股股肱者臣之象太顛闕天脫文王于羑里也九三其武王之定殷亂乎蓋與上六相應然有武之德則可六四小人得志甘言諂計逢主之惡宣露于外市恩售權飛廉之徒也五

曰箕子與斯人處是世其道當如是也比干之死不利微子之權未貞也一曰初六為伯夷太公則二公不處君側无自受傷

鳥被彈射則垂翅而不能飛蓋君子被傷之象斂戢而去亦為見幾也

醫書左手切心脉入于左腹者逢君之惡鉤致君心之術也得之則百方媚之久之合一惟其言之是從假上行私无所不至如君好貨先以珍奇動之君好

勇先以征伐投之也

六四小人得志而作難六五君子失時而處難皆由
上六之晦爾

家人

風自火出化自內始家人以女為與主二四得正故
利女貞初防早杜微二體柔服勤三為家之長寧嚴
勿瀆四順德以成內治五恭己以刑一家上九屋室
之終惟信與威六二者其所謂女貞者乎

初上治家之道也開其邪於始正其範於終家永齊
矣二四女正乎內也三五男正乎外也吳氏分爲君
臣之二家者鑿也在中饋則門庭之外非所履也无
攸遂則壺殮之外非所與也父死從子則後世臨朝
蒞政者皆亂道也是故君崩子幼擇賢宰而任之古
之制也

周得太姒宜家之福至于麟趾衛失莊姜宣淫之禍
極于洵澤利女貞者一言而盡天下之道也

禮別宮室詩歌蘋藻其六二之事乎閑家者令其守
斯道而已爾男不漁色婦不僻行故曰反身之謂也

睽

睽者目不相視兩情乖異也水火相悖而五柔主之
以君應臣故小事吉註謂衣服飲食不待衆力者也
天地賦形同於水火父母鞠育同於中少既而水火
各一其性中少各儷其配則睽也然物窮反本睽極
求合初九九四二剛不應初喪馬不能致遠見惡且

以辟咎至四元夫以孤而合矣二五失位居中各求其黨在難思濟者四遇于巷五往于宗周成之君臣是也三上居水火之極違離特甚其反本之謂乎始難終易无初有終聖人見庶類之各遂憫物情之多懷使之適變成功故事无竟壞道无不振者與

子夏傳曰取天下之物成天下之事異物相制或以相合弓矢小物合衆材之體成大器濟天下之務者豈止於一才矣

水火濟而亨橐籥鼓而風雨暘時而茂物黍稷和而成醴所謂睽而事類也

曳拖也引也使之前也牛角皆踊曰犂言其用力也天作而乃改經文一作去髮元非正訓石介曰天謂上九君父稱天三應於上為四所間故為上九所疑欲刑及之銑曰與曳牛犂三應上而進之難也天且劓上疑三而絕其通也古人云一日不朝其間容刀況上下之隔又有九四之譖乎未有屈而不申誠而

不白者至遇雨之吉則曳輿犁牛之勤昭矣

凡經文字改作別字及添一二字而足義者理必不然旋本訓反周折別一義也曳本訓拖引後之方為倒曳爾

蹇

蹇者行之艱也見險而止雖難其進度德而處必拯其難也然必致民於寬廣生育之地不內之於險阻使民愈困尸此者其九五乎六二履中應之冒重陰

而進盡瘁正邦事不一塗九三內卦之主二陰所恃
古人所謂保一城守一國者五下應二三遂來比皆
所謂朋也初六見險而止有知之譽六四反就於艮
連陽之實上六蹇之盡處无可往者來碩者三也大
人者五也得比得應蹇可濟矣

六爻二五之外皆不利往而利來見險且止徐圖拯
難之道其道伊何彖謂西南是已二五之外餘爻不
取應而取比蓋蹇跛難於遠應故也見險而止斯不

陷於險人立水上方能拯溺兵據要處才得解圍然
不知其為險而以為易而蹈之者衆也故贊之曰知
矣哉

蹇至上六猶蹇也未能平險也

解

雨在雷之下則澤行人動險之外則事濟難去勢緩
宜用平順无事而求功是又生難也故宜靜有事而
苟止是乃養難也故宜速

六爻二五正應作難者三陰解之者二陽也九二田
獲三狐田者有事也蓋施武用剛力去小人聖人恐
其猛而多傷教之曰得黃矢害除則止不求盡物九
四居陰易比同黨初六在下應之甘媚親附故名曰
拇初遠而二來矣六五非能解者守正委下維係於
二二有君子之德若曰爾以君子相維絡則有解而
吉小人斯退聽也四去小人而君子至五雜君子而
小人去二者相為去留李絳入而承瓘出欽若守而

冠準任也初陰在下九二解之甚易上陰在上九四解之甚難

維言任君子之專獲言去小人之力

六三負謂四乘謂二九四拇謂初

咸卦同

朋謂二上六

公謂四隼謂上一曰拇謂三則拇指其甘媚趨附盤旋足下如韓嫣之類三則盜君子之器莽操之兇也
一曰諸爻皆解六三彼剛大之事豈陰能為也故考訂如上所云

位高擅權衆所附也喜佞惡正固人恒情故戒四曰
解而拇

損

損之道二曰孚曰儉蓋奉上之道易涉諂諛物殺之
時當戒豐溢惟孚乃用儉否則嫌於簡薄也

初九以損事為已任故遄往始損於下戒太甚故酌
九二全柔再損則剥損下過深不為上益六三成卦
之由三人損一者兩也一人得友者亦兩也萬化以

兩而立增之則贅而滯減之則缺而廢六四大臣之位有偏柔之疾賴初之剛損之剛益而不全柔矣大臣改過福在天下不亦喜乎六五居尊柔而下人人皆歸之損三益上五比上則又益五也故曰或十朋之人助之龜弗克違鬼神福之也上九損極受益推以益下以人利人惠而不費獲茲三善宜矣

秦罷列侯而睽孤漢削七國而背叛失酌損者也

益

明王惠下則天下歌舞其德故曰利有攸往下受上
賜必損軀致命報之也故曰利涉大川

初九受大益者以大功當之為二陰之主不宜厚事
擅九五之民故志於奉上乃元吉也六二居益以冲
損四益初而二比初則四又益二也故曰或人神交
助位不當尊守正則吉有臣如是王者信用之以亨
帝如湯用伊尹格于皇天也六三以陰居陽失謙之
德揅凶則可六四與初正應成卦之由四依二遷初

初依三遷四陽為君為實陰為民為虛故四告初而
從自坤成震故曰國也六五不損於下為得志聖王
之道惟益民而已上六益極當損而求之不已立心
勿常如是也而不知戒凶不亦宜乎

初大作二大亨三大荒四大遷下之受益者也實五
以大德惠之百姓足君孰與不足信哉

中行在卦之中也指三四禹錫玄圭告厥成功故皆
曰用圭非常之舉非臣可專

損之五益之二謙受益也益之上滿招損也損已益人者人益之損人益已者人損之故權利之府遜之猶有害況爭者哉

决

决彖傳曰健而說决而和和者剛柔適中也惟健而說斯為和矣下三爻健也恐其過剛而鄰於暴故其詞抑之上二爻說也恐其過柔而流於懦故其詞進之

丁易東曰四陽為壯五陽為大壯初九曰壯于趾
此曰壯于前趾因大壯而言也

九三壯于頄指上六也衆陽決之三則應之違正從
邪有凶也然非三求之也或勢位相逼耳君子則決之
又決如獨行遇雨將沾濡而怒之必與之絕陰陽合
則雨壯于頄之譬也溫嶠之於王敦類此君子用
誠溫嶠濟以術内存兢惕外嚴號令周亞夫近
之

催汜一起竟亡漢三思不去再亂唐君子不可恃盛也

壯于頄三之位也有凶度其勢爾未必然也君子
夬夬九之剛也獨與上應和洽而雨覆說壯頄若濡
未濡也已愠而絕之覆說夬夬也此爻與隨九四相
類九四无意於三得三之係于上之有凶也有孚以
明則何咎乎夬之三非附於上有上之遇犯衆之怒
凶也夬夬有愠則无咎矣失中之得非中之是所謂

善補過也

姤

一索之女為巽四畫之陽為壯初與四應微陰敵陽
小人有不正之行而遇時君子危矣

係于金柅四也爻雖以近者得之而男女正應不可
廢也夫不字於四而即過於二則淫狡之惡愧於屯
之六二多矣

夬下五陽上而決一陰也姤上五陽下而遇一陰也

金匱要略卷之八
卷二
決九四與上同體當羣陽上決之衝而五又比上故
坐不安進不速姤九三與初同體當羣陽下遇之衝
而二已遇初故坐不安進不速決必決而四不能引
其類姤可不遇而三不黨於陰其得失又有辯

朱子發曰杞太葉可陰譬則賢也爪可欲而內潰譬
則民也九五遇九二之賢防民之潰此盡人謀以求
勝天然不勝而隕墜亦天也九五知盡人謀不終舍
天之命也蓋天命我右下民者銑曰此又難明子發

之訓可通蓋陰陽相勝如環斯循夾之極即始也則
治中生亂剥之終即復也則亂中生治其機運於天
其謀成于人時哉時哉未有不反者聖人兢兢業業
常早設防始九五中正之君存有隕之慮故曰懼以
終始其要无咎此之謂易之道也

堯舍丹朱而禪舜舜用禹準亂豈能剥治乎炎隕齊
芳而傳衷衷用華頤治何得不亂乎故曰人定勝天
二五皆以二制初蓋因其遇之初而防之不然成遂

金史四庫全書
卷二
君子望望而去又孰恃哉

萃

王者當大萃之時立廟祀焉得四海之懽事其先挈
萬務之要統於孝然必大人為主聚道乃全夫物聚
而多可以備禮人聚而衆可以集事此王者奉若天
道事神使民也大祀者孝也順時者仁也仁且孝斯
所以為大人而亨萃者乎有萃則分類有類則立黨
有黨則起爭五能萃二四能萃初近四无應則四萃

三近五无應則五萃上咸在交爭之際夫不能无爭者勢也卒定于一者各隨其分也古謂十人逐兔一人得之九人袖手者也比以一陽得五陰故吉萃以二陽分四陰故悔九四有權失位九五有位失權四匪躬盡瘁斯免專民之咎五仁德永修斯亡未光之悔初亂而後萃三萃而猶吝二五正應五用大牲君道隆故盡物也二用禴祭臣道恭惟致誠也上獨立无援求三三不應乘上上所惡危莫甚焉憂懼已甚

衆所不害當萃之極而知憂其異乎安危利菑者與
此之世有主則皆定萃之世比類則无爭

初九居萃之初柔无固守若號正應而固執之為人
所笑勿恤也所應者正所持者專往而之四何咎哉
一者所與專也握者所執固也一團之訓俗而无稽
自上招下為引自下附上為援

物聚而衆慮其難久二以引而吉五以永貞而悔亡

升

柔以時升指初六至五也凡木根著於土生意漸達
乘地氣而上榦而枝華而實是曰元亨元其生性也
人之升也亦然必有德斯以登用志在濟物用見大
人以斯道干之也故曰有慶出於幽而向明離隱而
仕也故曰南征吉

巽剛坤柔柔順剛也初六巽陽而上上信其志而不
以分九二剛中而應神享其德而不在物三入坤順
虛邑以待此下三爻升其位也六四上遜五尊升其

德六五下內二剛保其尊上居杳冥進德則可此上
三爻升其德也

六四王用亨于岐山程子曰止其分升其德美哉訓
乎非文王之至德不當此爻非程子之聖學不知此
義

王用亨于西山王用亨于岐山一曰亨作享祀之享
則王者祀天地未聞偏祀一山者若曰文王之為伯
也則未聞其有何盛事而傳之考古无稽徵禮不類

解經好異之弊也

凡卦四剛五柔者四多不美雖豫之四亦涉臣強之疑故升之四發此一義以示臣恭

困

二之剛為初三二柔所掩四五之剛為三上二柔所掩塞其前後无由達也世否道衰小人得志嫉賢醜正君子或屏斥田里或因係刑岸卦內險外說君子身困心通處困不能自通小人則然故曰貞大人吉

无咎大人二五是也二在下亨已之困五居尊亨世
之困亨已之困尚德不尚言亨世之困以實不以令
初六六三掩人實以自掩也死其至矣夫何利哉九
二九五皆曰利用亨祀人不信其言鬼神乎其德修
于顯者人見之修于闇者鬼神格之舜在畎畝父頑
弟傲夔夔一心達之上下文王在商虎譖紂囚翼翼
自戢昭來上帝學者豈因昭昭修德豈為冥冥墮行
難不入慮窮不改操曾子之貧孟子之不過厲行成道

之資也大矣

九二困于酒食窮而自養增益所不能九五劓刖尊而拯難刑戮所不服朱紱方來待君寵也困于赤紱失臣翼也赤紱所以為行步之飾困于者不能行也上六困極而求通之詞也困者塞而不能行故以征為吉征者體道而達變也知剛不可乘而下之是曰親君子知柔不可係而絕之是曰去小人士而修德德必修君而拯世世必治

井

井言乎德性也終日汲之不言損終日注之不言溢
在于已者无待于外也是故德壞于習修學則大成
泉敝于甕修井則常新三陰爻井之所也不修而泥
人所不食甕其內収其口斯完井也三陽爻井之泉
也井敝而水下注人不得食漂其泥水乃冽故曰寒
泉也雖然无人汲之有口幕之猶為棄井渴於暑而
坐斃靡伸一勺之濟非井之罪也君子德性完潔可

以化民而王明未際徒抱利器此係君與民之幸不幸耳我道何損焉君子之體井也有四德取其常行取其清義取其博施而不窮善取其有終而不厭收夏冠之名以收髮為義今作井者至上圓而狹之或用片石鑿孔以覆名曰井口以幕蓋之則不可汲又作磚井者自下至上甃磚圓而長似甕形弘治中湖廣民掘地得廢井者乃用一罏无底比用磚更徑約也

江河流通之水皆有汚染故味別惟泉天一之真味也

革

革之道三曰時曰位曰才程傳明之下三爻酌時而革上三爻成革而變九四大臣相君行革者不曰順命而曰改命夫革者前政之弊改而別創也立法作度使民更新必也永終知敝使後亡害君曰可而有否臣否之君以為利而貽患臣患之如後世批敕塗

詔者蓋臣誠心朴忠上所素信雖易已事違予言知
有大益於國也昔舜曰吁禹俞之皋曰都禹吁之君
臣亡嫌僚友亡猜述已功而不避其誇陳君戒而不
憚其激直如心役四體體從心令莫知其然而然非
至信孰能如是

井之後蠶以革者君子修德有常適用有變也不然
恒其德貞夫子有凶矣

二五水火之交故為卦之主爻

鼎

鼎言乎才器也器有大小隨量而受也鼎取新故初利出否蓋前亨之漬也二有實慎其妄從三耳革侍其虧悔井鼎俱以上出為功井戒勿幕鼎貴有耳鼎三雄膏可用亨養而四間之大臣行讒於君而賢者受疑矣五之耳改則三之行塞然上帝之亨聖賢之養固不可廢也三之食可待矣四近阻三之膏而反應初之否折足之凶可免乎大臣而信用匪人凶如

何也五耳也以上為鉉以九為金虛以待鉉柔以內
剛君之聖也上鉉也以九為鉉以上為玉剛以為質
柔以為用臣之節也君於臣惟恐其有所畏難而直
不盡故曰金臣於君雖致其无不忠信而恭不替故
曰玉鉉若後世之風諫詭對歸美引咎皆玉鉉也
初之顛去惡也四之折棄美也初虛鼎也四實鼎也

震

處震之道彖盡之二五又別發一義總括之有三一

曰有主二曰懼三曰遜震動也大難迫之也處之道
曰不喪七也仁人孝子之奉祀精誠之至也變忽起
前而亡移心處難者如是則无難矣古之人有之文
王姜里而作豕孔子被圍而絃歌五之无喪有事亦
此也雷之怒天之威行也驚恐者致其福惰慢者致
其災古之人有之高宗雉雉而司敬宣王遇旱而修
行三之震行无咎亦此也安其位而不知避則喪其
位怙其有而不知予則殞其軀以已裁物者存以物

逐已者亡古之人有之太王之去邠西伯之率叛上之畏鄰戒亦此也

五其長子乎不喪也毫即無喪有事也

艮

艮止也戢其身而弗遷也處之宜曰艮其背夫人資衆體以為用耳目止則廢視聽手足止則廢持行惟背可止不運亡見也傳曰時止則止時行則行言人必如是乃為全德艮背乃止得其所雖有靜亡動事

若偏而道當然伯夷之餓首陽箕子之適朝鮮志存
大倫可矣震來自外艮止自我皆非常之故先儒動
止靜止亡人亡我之訓語高而理不協夫易聖人處
身履運之方毋以是內非外之心求之

震為雷雷震有時艮為山山止有定恐人法此止靜
失於動用故傳兼行言之猶損之言益也下三爻止
之不固者有失上三爻止之善者全得君子以濟物
為心其心若止忘天下也止其躬者有為在心但身

不行耳曾子窮居而作大學垂王者之法於世可以當之咸四為心位面不相見否之道也故惟背可止偃僂為躬亦背也故傳以釋身字

漸

漸者進有次序不急遽也彖言女爻言鴻蓋臣事君女從夫鴻隨陽皆以漸其事相類臣不貳適女不更嫁鴻不再偶俱以正其道亦同傳言漸之善有四進得位往有功也謂六往居四位者致用之宅才而无

位則難施位而過才則不稱故得位一也進以正可
以正邦也四者諸侯之位君子之進正人而已已不
正未有能正諸人者三以正進四以正交女得所歸
富家大吉故得正二也其位剛得中也剛來居三陽
爻之中至五則進極而无所之故得中三也止而巽
動不窮也人動以欲躁而失正內艮止外巽順無慕
利之私有難進之禮而三四之動不困故止而巽四
也此卦本以坤三往四成巽女乾四來三成艮男名

曰漸諸家各解彖傳今頗承朱子發之義訓釋如右
干涯也磐石也陸平也水邊初起之鴻臣在下位之
象木杪也陵阜也阿山也空中高飛之鴻臣在高位
之象也

小子厲有言士之初進持正極言小人所忌止而須
之可也唐元稹初年不苟合上書言事特不堪困躓
遂附中官名行蕩然

飲食衎衎止而不急於進養德俟時故曰不素飽也

三四成卦之主俱以无應但因陰陽相比而合三居止之極而重剛不中上下之際故失靜止之德犯躁妄之戒三征四孕非配故不復非夫故不育此士之妄相朋附而扳援窺利者也異體而得有同心之義故曰利禦寇

六四飛而過於木之上回翔人間得平柯而止之且未即沖天凌霄也將登高位而擇所可居故无咎

臣皆欲得君而事之君亦廣求臣而使之故二五正

應未即合也五近於四四亦欲以為夫二近於三三亦欲以為婦久而他議寢後乃正配諧勝堪也任也非相爭之義

上九陸作阿地既相近韻與儀叶羽翮肅肅羣飛有序賢人君子登公輔之位不為名位所動德業光大天下望而則之

歸妹

漸曰女歸統言之此曰歸妹有帝乙有君有娣則國

君之配長子歸之長子即君之當位者周南之化正
家為先嫡妾紊則嗣子奪邦家之亂由是故聖人慎
始

男女合而子姓生子姓壯而父母老老者去而壯者
興息而復然終而又始若曰女之終婦之始宜曰妹
不可曰人天地交而萬物興猶男女合而子姓出天
地亡壞故曰大義人有生死故曰終始

六爻之序初三梯也五妹也震歸之故稱帝乙九二

不言歸妹其妹之夫邪卦至四爻女猶在室故曰愆期至五即嫁故曰有時三以陰居陽履非其正急售而為須四有標梅之歎得長兄之依遲正而成昏五之袂不及娣五之月則及望配陽為明至滿而挹貞德之著豈事容飾乎上六士刲羊无血男不成昏女承筐无實女不得嫁歸妹人倫之始終君子以永終知敝故卦之終而著道之敝也

吳幼清曰漸男方求女之事歸妹女將歸男之時以

未成夫婦而名卦也咸男女初合相與之情恒男女
成配久處之道以既成夫婦而名卦也

豐

豐盈之時猶人之壯盛也恃强无節百病肇之人君
於是時其憂乎其喜乎盖庸主之所喜明王之所憂
也然則徒憂乎聖人教之曰宜如日之方中已无暗
德下无隱情天下莫得藏慝畜奸則常豐矣

自初至五忌夫闇昧貴於光大上六則痛言奸臣蔽

主之害也李簡曰自古陰邪小人蒙蔽其君之明者何君明必憂危亡親君子則小人疎斥矣故仇士良傳其心秘於其徒曰天子不可令常閒宜以奢靡娛其耳目无暇更及他事然後吾輩得志慎勿使之讀書親儒臣聖人作易逆發其心之至隱而曉以禍之必然曰汝之掩君之明欲豐乎已之屋而專天寵者適所以揜其家而空其居也真景元曰小人但知竊權固寵為榮不知國亡則權寵无自保之理故秦危

而斯高戮漢壞而張趙誅

保豐之道曰宜日中故節也沛也蔽明者皆忌乎也
章也配者夷者明之助也皆吉

旅

旅蓋古之寄公寓賢或公子避患而奔潛於戚國或
大夫以道而去留於他邦猶欲乘機而入賜環而反
聖人取旅人晝食夜宿憑高望遠依山舉火者名卦
曰旅示以去處之宜毋令避患而得患用道而失道

焉

六爻六五九三為旅人初言其時二四上言其地旅
貴得衆而初瑣瑣失之矣二曰即次暫止也故曰左
次曰師次四曰于處安處也故曰出處曰處仁二始
在旅待時而發姑且須之故次為善晉文在狄是也
行必赴家避難必求濟旅必有歸可以安之而亡計
乎雖得資斧之利其心不快狐趙不欲晉文在齊是
也處旅用柔而不撓不變心存乎剛五中三過故五

得譽命三遭焚次況於上九事窮无變好剛不已不可處不能行有號咷而已

王烈之賢不能處遼東況其下乎

楊廷秀曰六五王之蒙塵者少康逃虞思國宣王匿召公家是也禍亂之作天其啟聖人者乎上逮者聞于天也

射雉一矢亡射雉出旅也雖有亡矢之害而卒濟

巽

巽之立卦初與四也二五雖據用事之地權不在手
故曰剛巽乎中正而志行言必用初與四而後得志
也初與四有權而非用事之地故曰柔皆順乎剛是
以小亨言必順二與五而後亨也利有攸往為于二
五也二五大人也有權无位非大人孰容之

巽者德之制也又為行權宣布政教芟除強梗非專
執柔者況風亦有落木摧物之象焉初下不果宣命
行事之初利於勇而行則正也故曰武人四承尊履

正體柔用剛行命有功故獲三品蓋去不仁削大患者二卑巽矣以之事神則可達已之誠不厭其丁寧煩複也五中正矣以之宣令則利濟物以漸必用其詳審周信也三煩數之令人所厭也故吝上巽窮之地威不行也故凶

甲事之始也庚事當革也以十干取義自甲至戊已春夏生物之氣已備庚者秋冬成物之氣也故改生為殺改榮為枯改燠為寒涼改露為霜雪故四之田

而獲五之初與終皆有用剛正物之義焉五直曰先
庚後庚矣

兌

朱子曰若不剛中則違道干譽便成邪媚下面許多
道理皆由此出銑曰革與兌傳皆曰順天應人蓋去
舊易流於暴說民易流於邪天道之當然者推故乃
所以成新人心之同然者有事正所以省事否則盜
賊竊湯武之名窮黷假春秋之義民其多艱矣哉

初不比於陰與二相說以中節交君子君子得以用其忠故吉二雖說於初與三相比以誠心待小人小人无所用其奸故悔亡五之中實孚于上猶二之中實孚于三也然陰在下之物必剝陽已盡而後至上也君子以誠待之而小人未必无相害之心有厲者度其事勢如此不可不豫為之戒也六三之來來上也上六之引引三也小人在上則援其同惡之人進列在下則致其同惡之倖就已二小人合則君蠹而

國危九四以剛得位又居二邪之間介而別之伐其
交離其萃然需乃事賊遲則幾失故貴乎疾君无孚
剥之厲喜大矣

商兌謀處二陰未寧者計未定也聖人告之曰介疾
也

渙

渙者小人遭難離散而避之大人立德與功解難釋
險也王假有廟萃神之渙利涉大川揀民之渙尸此

者其二四乎二以剛在陰中力能濟也四以柔在陰
外動无違也

六爻初在渙始為力易而戒後時故用馬壯二奔陰
中其來速而得安倚故曰其机馬與机皆本爻之象
此二爻自揀其難也四為巽主風以散之在水上則
激波在水際則解凍四近不比三遠不應初三與初
无所用其黨附之私故為渙其羣而致一以承五然
散小羣而成大羣其聚如丘大臣勞來安集之用靖

王室不夷其慮九五君位所謂出令者曰汙言其信也曰大言其道也五出之四行而致之民此二爻揅世之難也上九處險之外居巽之極若張翰之避趙王倫者六四九五為渙之主可依之成功而三獨應上是无拯渙之心惟求自免而已

一曰卦自否變二柔之四為渙其羣此但可曰離其羣非渙也況卦變自如程傳本之說卦其餘支離穿鑿

鑿

節

節者有分限而不可踰之名在學則約情寡欲以養德在政則作制明禁以齊民然協諸義合於中可常不厭故申徒狄之忠陳仲子之廉不可恒諸已墨翟之儉許行之耕不可施之民

二不應五故當節而不節三居澤溢故過節而不節初因二塞而不出故无咎下三爻皆未善四守節以承上安則非勉五制節以一民甘則適中上至卦終

而不變故貞凶上二爻皆盡善然禮奢寧儉未有刻
意尚行失身取災者故曰悔亡

災上作苦人所不堪稼穡作甘人所不厭聖人之制
致嚴慎則不可踰也然禮之宜情之實非矯而為之
民之循之也久則嫌間不生義分相浹如魚依水如
鳥在林雖一日違之而不能苟一事外之即不安履
禮也而用兌節約也而貴甘此聖人之中萬世由之
也與

履戒夬節戒苦一偏之行君子不由也故曰中焉止矣

中孚

孚者鳥卵之實柔在內而剛外包之也

初九虞吉居信之初貴夫專一戒於二三惟四是從
六四馬亡近上之位臣而擅有逼則取咎惟率下奉
上雖以蕭長倩之大節李文饒之偉業俱以朋比失
之馬亡之義大矣

鶴陽鳥也其飛冲霄其音聞遠而鳴乃在陰山之下
澤之中幽暗甚矣言其誠之至也實用其力而德成
于內誠之謂也誠則形而動子和之爵靡之不期而
然也翰音為雞但栖於埭翔於地飛類之走者風傳
其音于天而實不能舉聞過其情无以副之日見敗
露雖貞亦凶況非貞乎

二居中上處窮鶴高而就下雞下而登上

中孚成卦以柔在內而剛得中也上九剛在外而不

中中无其實世有取虛名而委之任重鮮不僨事趙括拒秦兵殷浩正桓溫是也

小過

亨利貞可小事不可大事謂四陰也飛鳥遺之音不宜上宜下大吉謂二陽也初在卦始而銳上居卦終而極飛鳥雖凶上有災眚黨錮盡而閹豎滅偽學禁而佞曹誅小人之讎君子能自免乎善人國之紀害之則逆天也逆天者亡二五中也聖人教之處過之

宜祖謂人之始初六是也妣配祖君謂臣之主九三是也臣服君位過其祖與之配進則遜君反於臣陰可過陽不可過如是者无咎妣與臣皆指六二也六五陰盛陽微不洽為雨以六之在上也弋之則解位過非脩德之美弋取非撥亂之才所謂小事也君子處小人之下彼猶忌其賢而戾其升苟過之則百方害之九三弗過上六當為之防一小人生心其羣叢起而助之虐或戕謂初也九四弗過五而遇謂承之

也雖曰无咎當戒往而永貞三為二陰之主故凶四居二陰之下故无咎九四君子之失位者雖遜以遇之亦不與同流而往予之於陽貨是也往則與小人同受其敗時之從蔡京是也小人雖一時得志而終不久君子敬德潔已遠利與害以待天之復而已矣弗過遇之君子待小人之恭弗遇過之小人凌君子之橫六五之權不能雨盖有穴其間而為之間者上六也不仁居亢以屯其膏小人恃君之寵居高位而

播惡於衆君德為之累夫君子苟无意於盜弋而去
之陰過之禍息吾心明於天下矣

陰過之世君子上則為陰類所嫉取禍下則擇卑處
自晦全身是故小官下邑無權可爭陳寔是也埋光
鏟采无名可忌申屠蟠是也皆所謂下也

既濟

度水已竟曰濟二物相資成用曰濟水在上以金盛
之則不滅火火在下以木傳之則能熱水亨飪之功

萬民以濟夫治亂相尋貞者則勝初吉未濟變為既濟也終亂既濟復入未濟也進而不已則无終止而不修則肇亂

初九曳其輪者進也濡其尾可以濟而不遽也六二與五正應需而未行虞廷儆戒无虞在於野无遺賢世之方平以士為无益而忽之者衆也始喪第而七日得之程子謂中正之道无終廢者也九三令主伐夷憊而始克盖時過力怠所謂有生之樂无死之志

故也六四盛極而衰美繻而為弊初其曰有者言其
必然終日戒則盛可保矣大臣懷忠憂國者也九五
謂盛不如衰盛則恃而怠則亂衰則懼而修則治東
鄰既濟也西鄰未濟也備物者誠不至致誠者物則
簡鬼神享誠而不在物上六妄進違時厲之道與
弗者車之蔽喪之則不可行女子擁面出門况乘車
乎

一曰寒始索裘晚矣繻而又有衣袂廣備也

初濡尾自止而防後也上濡首自恃不慮前也歷險
无防舍溺奚適故曰亂者有其治者也

未濟

火上水下未能亨飪故曰未濟卦始乾坤正君臣也
終既未著世變也天地之大德曰生陰陽之迭運曰
易天運於上地載於下水火交化於其中萬物生生
而不窮君宰於上臣勞於下德政並用於其民萬世
秩秩而不亂久之運類而匪人任則世亂而賴人拯

治之極者亂之始也亂之極者治之始也是故易終未濟春秋終獲麟所以章天之心而啟後人之圖治也與

初亂之始涉之首故濡尾二任之重事之勞故曳輪未濟者盖有待也戒於征而畜全力可以涉險四居明之初體剛之質伐叛有功五任賢勿貳付物以能有孚而吉未之上盖既濟也享其誠而孚飲酒貴於知節夫飲酒无咎自未濟而入既濟也濡首失是自

既濟而復未濟也所以見人事无常天道多變嗚呼
致亂易反治難從欲易守道難君子退易小人退難
是以常有千年之亂鮮有百年之治

坎輪離牛牛力曳輪上承五命非不進也

震為長子用四伐叛有德之君親征不足貴用得其
人大國即震之有也震用其蠱之有子者與


二之曳輪忠臣也鞠躬盡瘁知无不為四之震用功
臣也帥師宣力兵无不克五以孚而任之斯以反未

濟為既濟乎

以柔處明貞乃吉而无咎下任九二君子之光也下
賢為謙謙尊而光光涉於外故又曰有孚暉者日中
之氣管輅曰日中為光朝日為暉

凡彖傳象傳即易解也往來上下承乘比應位也繫
詞所謂相攻相感相取相得情也以是考之易可言
矣自術緯之附會方士之卦圖紛紜爭售乃混易之
義亂易之象今一切刪削專宗孔氏若步康莊之夷

馬



讀易餘言卷二

欽定四庫全書

經部

讀易餘言卷

三至五

詳校官大理寺卿

臣富炎泰

通政使司副使

臣莫瞻菴覆勘

總校官降調編修

臣倉聖脉

校對官員外郎

臣張慎和

謄錄監生


臣鄧培善

欽定四庫全書


讀易餘言卷三

大象說

乾



九



明
崔銑
撰

八卦之象廣矣聖人舉其大者乾陽之大坤陰之大
六字皆然天行以氣言古渾天云天如鷄卵地在天
中如卵中之黃二十八宿繞而轉地之四圍上下皆

虛空虛空即天也天何以有行即其宿而言之耳象
用以字即君子之用易也自強不息一人之身天行
健也天晝夜行九十餘萬里人一呼一吸為一息晝
夜凡一萬三千五百息人一息天行八十餘里夫氣
固有天矣何莫勸斯德也

坤

地勢以形言上坤下坤一高一下勢積而厚焉地之
積也不厚則載物不勝其重而墜君子之德也不厚

則載物不勝其重而遺

屯

陽蒸陰則陰氣騰而為雲陰鬱陽則陽氣奮而為雷
二氣交和則雨屯屯者雷動於雲中而未雨二氣尚滯
且世何以有屯蓋因彼此情結而志離君子綴謀締
慮往而亨之如治絲然解其結如理其緒聚其渙如
比其類解法雷之振聚法雲之合其道伊何曰物有
主則定國主於侯人主於心

蒙

泉方出山而未達如人方在穉而莫適也行言事也
怠則隳德言心也棘則害泉達流於海雖折必東果
行者取之發源於山所涵則邃育德者取之一曰初
出之泉潛伏未見亡所污滑未發之蒙蘊畜在內亡
所誘化必行有漸泉之達果行育德蒙之亨德者行
之自出行者德之所形

需

水氣升而為雲上於天雖未雨而雨可待也君子飲
食燕樂時未亨而亨可須也君子豈必醉飽鮮濃單
食瓢飲之樂皆然他無一為安以待之爾夫需豈易
能哉世之遭間阻進者百爾求通終焉致敗幸險為
途固無足咎謀人國家抑又甚焉出奇策變機士也
尋幾曲就知士也夫而忘身義士也死而如歸勇士
也一致反噬君與受之於乎可不慎乎

訟

天上水下勢自不接而違訟之象也人之情不相合則睽訟之由也故曰天與水違行蓋訟起於負剛好先者作事謀始俾其不違而已人之爭二曰是非也利害也天下有公是公非合理之謂公事勢有當利當害協義之謂當惟理之明不必非在人而是在我惟義之安不必利可就而害可避理也義也心之所同然也君子之謀始有道矣

師

地中之濕者皆水田中之耕者皆兵水行乎地兵隱
於農故取為象容之者居之也比閭族黨州鄉之列
則如坤之受水畜之者聚之也田廬穀粟桑麻之利
則如坎之有防王者以道得民以寬御下平日周撫
字之恩有動得敵愾之報否則傷民之力環國皆仇
讎安得而用之

比

地上有水非澤所鍾散而會川各有所比先王象之

建萬國使各子其民親諸侯使咸歸於一公侯伯男
封疆有限建之也朝聘往來恩禮亡間親之也夫上
下亡分強弱不齊則大凌小衆暴寡趨於亂而感其
生於是強有德者出焉然後大小之勢分衆寡之情
一小事大大字小蓋先王封建之善也唐虞萬國衆
建而少其力則多助而易制周之國千有八百夫子
繫易其遠慕先王之盛而慨周末之併與

小畜

天非有上也以人目力所及言之風有氣而無質況
行之空中但能卷浮雲止飛鳥春秋所書六鷁退飛
過宋都傳謂風也是其證也懿柔粹之小德也以懿
文具德則和氣令詞愉色婉容皆全德之輔固不若
多識前言往行啓發培灌之饒也

履

凡履地而行足動而地止天運澤上澤瀦不流故為
履君子辨上下以定民志民志何以不定由上下未

辨也貴賤不殊尊卑亡別既可相凌遂欲相僭夫上者如天之不可為澤下者如澤之不可為天見其勢懸絕已其心安幸程傳至矣考諸近世賦重刑煩農墮商消越限獵級惟士為然庠序慕榮利朝廷尚躁競亦上下之未辨與夫舉士以行考實以功掄才以職序賢以位一核執於上萬妄息於下矣

泰

天氣下降地氣上騰曰泰后乘景運裁成輔相非為

天地俾民因天時乘地利養其生而安其業乃左右
民也斯后致世之泰焉銑伏讀卦象而三才可重矣
故有天地而亡后人而禽木也有后而亡天地后亦
枯槁也天生之地成之后用之然天回開治之運后
有善道之功天發淳朴之氣世多敦龐之民天地否
而萬物塞聖人其奈何豈但臣難遇君而后亦賴天
也與

裁成輔相舊解多言養銑謂天地生萬民后列其彝

倫天地生五材后制其器用亦是也

否

天氣不降地氣不升曰否猶君臣之無交儉德辟難
不可榮以祿乃君子之處否也其德既歛其名不聞
人亡能知其賢而祿之夫德之見者名之著也名之
著者祿之及也祿之及者害之臨也小人道長之時
祿則與之同事彼能容君子之貞乎儉德坤之嗇也
不可祿天之高也

同人

天運上火炎上故曰同人君子類族辨物毋乃乖於
同之義乎蓋物生雖同其類各殊其類雖同為品又
別不別其異亡以為同雜鍤與鏐而均謂之金雜珎
與瑜而均謂之玉非但金玉失其真而珎與鍤亦亡
用矣夫族有高下類之則高與高同下與下同物有
大小辨之則大與大同小與小同處不失方用各適
宜矣兼之者法天之量辨之者法離之明

大有

大象明以日言蓋日君象也明則人可體行火則指
氣為類有二已麗於物其焰光明有體之火也未麗
於物其氣溫暖亡體之火也暖氣冬潛地中子月漸
升夏見於天上午月則極盛矣故曰大有歷家星火
考夏晝漏最多天星大火時盛事煩善惡生無不章
別之則善者屈而不伸君子過人之惡使不復為揚
人之善使益勤修以順天命非其私意天命有善亡

惡故爾一以法離之明一以法天之道也

謙

地中有山與水猶人身中有骨與血若地下則虛空也山各有脉如水各有源其形起於地上其根發於地中觀天下之勢最下而負海者多山地中有山何疑焉大象皆實體所謂仰觀俯察取物象宜者非寓言也君子哀多者以益寡者分人之財不以自殖教人以善不以自賢乃稱量物之宜平其施不見我之

高而彼之卑也上句象山在地中下句象山與地平
豫

陽消而始生雷在地中陽長而日盛雷出地上遇鬱
之久奮而出聲至通而暢和豫之象也內順外動和
積中而發於外樂之原也先王作一代之樂發揚祖
考之德而崇大之盛其享禮以配上帝幽明人鬼訢
合無間說者曰雷發聲於仲春收聲於仲秋故禘有
樂而嘗亡樂固哉斯言春生物作樂以樂其來秋死

物致哀以哀其往宋人謂春月樂秋月悲蓋舒慘自然之理焉

隨

朱升曰雷陽薄於陰所為龍陽氣之聚靜則潛伏動則衝破陰氣而有聲即雷也此說於象為近舊傳收聲於兌乃言其時也太室有龍潭笑語黷神龍龍怒則有雷韓退之游而遇之見題名龍之雷隨澤而靜故曰隨君子嚮晦宴息如雷在澤也夫人之夜天之冬

也冬雷則災冬暖則厲蓋造化不息則歛不凝固妖
沴乘之故三才之理一動一靜靜所以養動之根也
日入而息人事至微者上法天運道不可須臾離信

哉

雷隨澤靜
人隨夜息

蠱

吳氏謂山腹有冷急之氣則山枯而崩故曰蠱銑嘗
述之然理則未然夫風者動機也驅水氣至則寒涼
驅火氣至則溫暖風烏有寒暖哉凡物動則有成壞

山以靜為體山下有風山之體動而搖矣故曰蠱動之不善者也君子振民育德者民心偷墮風俗澆薄振而起之使治其生業修其孝弟忠信則民德歸厚矣此動之善者也所以治蠱也風之鼓外物振民也山之涵內氣育德也凡物遭風吹久則必壞置之則遂朽治之則更新

臨

臨古訓監也謂監守也陽在上者也而履於初之下陰

在外者也而依於二之中若有所監守然澤上之地
岸也岸下臨乎澤故曰臨言其切近也君子臨民以
德教容保之而已容者萃之也保者安之也然非勞
來匡翼從而振德何從而永奠哉教思無窮者如澤
之漸入地中終古不涸容保无疆者如地之周於澤
外涓流不洩 五行生克本出緯書揣測小驗諸儒
采以言易夫子十翼惟水火為重兌為澤不曰金震
為雷不曰木夫小道豈無可觀然惑世罔事其害隨

之況又以亂大聖之典乎

觀

平聲

風行地上卑而及物所加者偃所觸者動故取遊歷
周覽之象為觀先王巡省四方乃觀民俗為之設教
蓋國有異政則民有異俗奇袤淳龐相為進退王制
太師陳詩以觀民風令市納賈以觀民之好惡修其
教齊其政不易其俗是也如是則天下化中矣省風
象風之行地觀民象風之吹萬設教象風之因竅而鳴

噬嗑

電烜於上雷震於下物之梗於兩間者皆消噬嗑之象也先王取明威兼用之義明辨按罪所贖之罰使民懲過不疑於所坐檢敕平日所定之法使民畏法不犯於有司堯典曰金作贖刑罰也象以典刑法也問曰噬嗑與豐之象何以異曰豐明在先故致刑噬嗑動在先故明敕而已

賁

山腹之內有溫暖之氣則土脉鮮潤草木華暢所以
貧乎山也君子以明庶政法度典章繫乎有文无敢
折獄蓋貴情實而忌文飾夫獄之難聽久矣五刑已
去三德已全明清單詞審克兩造指顧之間存亡攸
分猶有原情固慝失於出入者漢宣管仲幾陷於死
若恃其明察深文巧詆緣飾以成要小人則敢君子
則无敢夫一刑也夫子五致意於大象蓋疾法網之
苛文吏之奸歎民之多艱也夫先之以臨觀教養也

次之以噬賁刑罰也刑以弼教之不逮也是故政有
叙矣 豐明而動故致刑賁明而止故无敢一於止
則奸何懲而善何伸一於動則刑日煩而民日玩然
无敢者審之詳而發之重也非不聽也 氣暖於內
而賁於外政發於心而明於民

剥

山之下趾朽蝕消圯則上頂傾陷而下附於地故曰
剥上以厚下安宅蓋君居民上如山盤地上山以地

為基君以民為本厚其地則山保其高厚其民則君安其宅夫民以戴君亦以叛君得之如菑田以飽腹失之如反裘而負薪於乎難之哉夫卦有吉凶大象皆善蓋天下所有之理君子皆體之卦雖凶而理可通於吉則取之剝與明夷是也古云不善人善人之資况造化之實體邪

復

復反也有四義行者歸離者聚過者更喪者得也復

不曰陽而曰雷蓋陽出地為雷至冬陽消不雷矣子
月陽生地中而長春之震擊即此一陽之還者故曰
復先王於冬至一日之間閉四郊之闕下而商旅上
而后王皆禁出入如雷在地中且以養微陽也夫坤
十月之卦必至冬至之前坤陰方至上而足復十一
月之卦必交冬至之後復陽方自下而生日陽之宗
也沒西而後生東盡晦而後交朔積之一月元齊履
謙辨其不然夫陰陽消長言化機之用與藏猶人之

寤寐也陽極而降降極而升陰伏而升升極又降皆
歷六月而成亦非今日為陰而明日頓然為陽猶人
倦已而寐睡熟而寤耳豈真若穀粟然根蒂脫落乃
復種而芽芽而榦哉一氣發則一氣隱此氣伸則
彼氣縮陰陽消長進退似不過此宰之者其太極乎
无妄

无妄者誠也天以誠動物以誠應非強而然窮冬寒
沍生意闕塞初春一臨物萌芽矣氣尚鬱而生尚屯

也驚蟄之月雷霆一振以聲動萬物之氣由是鬱者
達屯者伸翼者動而飛足者動而走生者動而滋植
者動而榮時至而皆化氣氣化而各成能故曰物與
无妄言莫匪自然也聖人對時育物豈能有所先後
而加損之法乎天而已

大畜

據渾天之說凡地之上虛空皆天也故曰天在山中
山惟畜天故貯氣濃厚殖產特盛中庸謂草木生焉

寶藏興焉是也君子多識前言往行以畜其德故大業成焉爾夫山本天中之物故氣與合一而成大畜前言往行乃先得我心之同然者也孤聞淺識不足以議道而盡變故貴乎多君子考之於彼協之於一撫其華必茹其實采其質必寘諸用始也由見聞而得終也并見聞而化如蜂之掇花而蜜如身之飫食而肥後人雕績組織以為工隱噴奇雜以為博黠者矯之曰六經注脚讀書糟粕銑伏讀聖言竊嘆學之

失傳也

頤

人之頤上止下動艮止于上震動于下之象也山以形雷以氣程傳以明其山之生物動其根莖云云又若言具義者後人遂迂曲求之乃取諸雷洞亦過矣頤上取義故以切近者曰言語飲食也此象震之動慎節象艮之止

大過

澤水潤養其木者木高而澤卑也今溢漲而浸沒其木不亦過甚矣乎君子負大過人之才乃隱側陋而屈下僚然節行不折其居此時也或進必大有為反本末之弱獨立不懼也或退必貞自守樂道義之美遯世无悶也木在水中特而不欹獨立者取之水過木杪沒而不露无悶者以之君子復善而誠資善而德可謂有養矣故抱大過之才而成大過之事序卦曰頤者養也不養不可以動故受之以大過

坎

相續曰洊水之流也前者往而東去後者又從而西來兩坎之象也始終如一之謂常德行有常則處暗如顯勤小如巨一再不已之謂習教事能習則困而學者如生知利而勉者如安行彖所謂不失其信者與或曰坎北方之卦積陰肅殺之氣坎險也難也兵凶器戰危事故坎為兵戈之象詩序有常德以立武事月令仲春教振旅仲秋教治兵銑伏讀夫子之書

曰以不教民戰是謂棄之用武而以文教古之道也
大象五言刑夫兵刑所以治天下之間大則兵小則
刑不應畧之或者之言可存

離

日出曰明沒曰昏作起也發也明作猶言明發兩猶
再也日一而已旦旦明作見重離之象大人以德言
繼明者猶言緝熙也故能徧照四方不然耳目所及
且蔽之况萬里之遠哉程傳稱先王者所以立法制

建國作樂省方勅法閉關育物享帝是也稱后者王之所行財成施命是也君子上下之通稱大人王公之通稱

咸

山上何為而有澤謂山之虛也澤氣上蒸于山而山受之人心惟虛方能受人蓋心有私主物又窒之自滿自足事將衝決家語云損其自多以虛受之故能成其博也難曰感不以正亦將受之乎曰彖曰利貞

蓋善惡從違在其中矣長善而抑惡背非而從是悉
有以通之斯之謂貞否則以量而容擇合而受程子
固小之矣

恒

雷震則風發二者常相從而不厭故曰恒或曰雷出
而上風入而下夫雷風相遇於天地間上下安有常
又曰雷迅則風烈風飛則雷厲此侵益之象故惟程
子一句盡之君子立不易方方謂事情所向君子立

有定向而不妄動也咸之彖言感象則言受恒之彖
言久象則言定易變无窮一曲之見難與共學 隨
方之所在而立非止一方也

遯

山止而天運天若遯去遯乎不相及也君子之遠小
人豈必壯于頄悻於色疾之已甚惟在我非法不道
非禮不履則小人遠何者其道不同其交自疎其德
既高其心自服其迹既峻其狎自止故不惡者待彼

之禮嚴者守已之節夫天下有山遙望之若相連及
登山巔天自上而山自下君子之取象精矣

大壯

二月之卦也雷始發聲過伏之久乘時而震其壯可
知非禮弗履非強有力者不能故曰自勝之謂強朱
震曰雷在天上非所履而履故史墨謂雷乘乾臣強
之象君子是故動必以正銑謂非據而邪敗亡立至

晉

日者衆陽之宗假之以爲明者若月若星若電若霞
是也日乃其自明未出地爲地形所蔽及離闇漸騰
明著于上晉之象也君子德本明而自明之氣不能
拘欲不能掩上達高朗之地象日之自地而升也乾
之象曰君子以自強不息我用我之剛晉之象曰君
子以自昭明德我用我之明由己而由人乎哉 日
出於闇曰晉德去其蔽曰明

明夷

古之言天者或謂日轉虛空與地相遠今日日入地
中則其說謬矣日惟入地中斯有晝夜若止於天畔
旋運則近日為晝遠日為夜此以為晝彼以為夜豈
陰陽幽明之故邪方日中天四國大明萬有畢作入
地則為明夷夫大明而有闇况於人乎夫水至清則
無魚人太察則無徒君子之明必用晦也惟不用其
明故能合天下之明為明若察察自昭則蔽之者至矣

家人

風者火氣之所化炎氣上蒸猛急飄揚者即風也廣
中颶大作則空中火飛火極明處風亦盛蓋氣所奮
激皆風也口鼻之虛亦然君子知風之自萬化出於
家家本之身身修之言行言之接莫親且久於家
人豈容一毫強飾乎有物有恒則信中而達外矣巽
象言有物入於人也離象行有恒明可見也 何粹
夫曰風者天機之動日者火精之發風不出於火但
取風盛火熾爾

睽

火性炎上而又在兌澤之上澤性潤下而又在離火之下上不逮下下不奉上故為睽也君子以同而異謂大同之中有不同焉者非立異也同者秉夷之則異者制行之宜子曰君子羣而不黨又曰和而不流同象二女之同異象火澤之異

蹇

水流而就下勢順而利今在山之上為勢既逆逢石

則礙信乎滯滯難行故曰蹇君子遇蹇反求諸身增
修厥德不强通而倖進孟子曰愛人不親反其仁治
人不治反其智禮人不答反其敬是也易象示人處
難之道有三在屯濟以動故曰經綸在困濟以說故
曰遂志在蹇止於善耳故曰修德屯志在救民困志
在善道蹇猶可須也因事舒迫相已進退而酌成之
已爾

解

坎在上則為雲澤未及物也屯也坎在下則為雨澤
已及物也解也君子於民過則赦之以其誤也罪但
宥之以其故也解者物離舊而更新之時赦宥所以
滌其舊而與之更新也過弗赦則非仁罪止寬減則
合義雖然小過可赦大過必終其罰可也小罪可宥
大罪必極其刑可也赦令數下長奸滋惡非民之幸
也赦宥解之義過動震象也罪陷坎象也

損

澤滅木則大過者澤也上有澤則虛受者山也上有
山則損者澤也風得雷則益者雷也象各有所重也
山下有澤則澤寇山而山塞澤澤日壅也山日削也
揚雄曰山殺瘦澤增高是也夫人忿有所激而暴發
將忘身以及親也欲有所耽而固溺若沿流而靡極
也人所當損者莫大是也夫君子所性雖窮居不損
而之二者必損之害性故也

益

風者天之所變雷者火之所化風則陽交於陰而入
雷則火伏於陰而出兩皆動機故勢相須驚蟄雷奮
矣遇烈風則震者增其勢而愈迅蓋若風盛火熾然
風以益雷也君子見善慕而遷之若在有過悔而
改之不在大厥德崇矣人之益孰大於是問曰二者
孰難答曰改過尤難必如顏子不貳其庶乎夫事已
而心係之朝更而夕忘之古人謂頻復不已必至迷
復故善須累而成過才一而絕損者於此為損益

者於彼為益惟兌取兩相麗也 楊泉曰積風成雷

故曰益

夬

水氣上天雲興雨降惠及物也君子施祿及下養賢也
共治天職必共食天祿也法天祿賢何有可利若
以德自居是有其善也公而私之道所忌也故古人
處功惟以謙也 氣上蒸水下聚皆謂之澤

姤

萃

天至高也物至卑也風自天降與物遇也是故水波
谷鳴草偃木撼也后至尊也民至卑也施命誥四方
后不親臨也遐馭幽域命悉達也天以風誥萬物后
以命誥萬民德之流行置郵速也四方風動承休命也
澤上有地聚而為澤萃之象蓋川壅為澤乃衆流所
匯若彭蠡震澤之類是也夫聚而亡防則民生心君
子簡戎器之壞者易而新之以備不虞非右武也易

貴未然之防焉

升

木伏根於地中發芽於地上積以歲月則其高尋丈
可以干霄其大合抱可以蔽日何也順也君子之德
何以異於是順德猶言率性君子仁義禮智根于心
順則遂其始達之基積則循其下學之漸升而不已
以成高大若夫暴行逆德凌節不順未能升而困隨
之矣

困

澤必資水以利萬物水在澤下是水漏於下而澤枯
乏何以資物故為困也君子致命遂志語曰見危授
命致命也從吾所好遂志也小人則不然凡可以幸
免者无不為卒不免焉徒喪所守而已體坎以致命
體兌以遂志諸家謂天命似未然程子謂以義致命
如義可死則死命雖當生不計也裁制在我而已若
付窮通於天袖手待盡豈易之教哉

井

以木為器汲水而上井之象井鼎又以成器為象焉
君子法井之象制為井田使民服田力穡勤勞于下
供給乎上勸其相助不敢惰農自安一井養而不窮
也

革

澤以瀦水今乃有火革之大者也蓋澤之大者為彭
蠡雲夢瀰漫數百里北方大陸之類受河之溢者若

歲旱不雨外水不至上為日所燠下為火氣所蒸消
乾其水而白地出焉故曰澤中有火革君子治厯明
時夫水火相息乃成四時寒暑之變中有數存焉厯
所以步其數也厯差則時不明此變之大者也自有
厯以來精其術者代有之歲久必差則治以求合蓋
天運不齊而厯乃其法也後世凡學不及古人惟厯
則愈精

鼎

以木入火則火然木木上有焰成亨飪之用鼎之象也君子正其所居之位所謂齊明盛服非禮不動者也定其所出之命所謂堅如金石信如四時者也二者法鼎之重固不遷也朱子謂津潤上行為井或人遂謂火至木杪果熟為鼎蓋二卦以成器為象諸卦中自為一例夫人非水火不生活井之汲鼎之亨日用不可須臾而缺也 今隆慮山居艱水鑿井至二十丈竟亡泉作土窖儲雪至春夏飲之井之用大矣

震

相續曰洊上下兩震之象古人迅雷風烈必變况洊雷之震乎君子恐懼心存敬畏矣而又修省畏天以誠也修者飾其善而進之省者察其過而改之周王遇災而懼側身修行天下喜於王化復行故恐懼而亡修省見於聲音顏色之間而已矣

艮

雷風水火及澤皆兩各能往來也獨兩山相重各止

其所高下攸分發育之功隨而異人之至難止者心也故取象於艮在上則思止於上在下則思止於下不貳不雜法重艮也彼之言心學者多援艮夫艮者思有所止非視心為槁木而寂之也若面不相通否之道也體各定用猶事各定理

漸

地平而氣溫厚生木也易山峻而氣枯燥生木也難易則長茂速難則長茂遲升漸之木分焉木生亡不

漸者山產尤不能遽遂也君子居賢德善俗亦漸也
夫俗非一日所能善書稱既厯三紀世變風移然賴
周公之治君陳之和畢公之老成選賢德居位以善
民俗謂教而養之漸染成化非責效於旦莫之間者
鴻不再偶女不更夫臣不貳適

歸妹

雷震澤上澤隨而動長男少女之相感此私情欲恣
之時也君子永終知敝使不流於惡蓋始合不正終

則必乖乖而圖之已亡及矣書曰慎厥終惟其始故
早為之謀乃所以永終也卦名歸妹震長男為兄兌
少女為妹父不及嫁則兄嫁之蓋有國之貴者春秋
於魯女適人歸寧之類必書衰世人紀散亂記之見
其厚薄內重先君之遺外敦甥舅之好也此卦下三
爻二妹也初在下為娣三躡上為須上三爻五歸妹
者也四愆期而待上過時而背女不及歸男不授室
周禮仲春令會男女之亡夫家者豳風殆及公子同

歸聖王重人道之原謹昏禮之始也 陰從陽動婦
以夫歸二氣和而成雨二人合而成家

豐

雷電交至威焰盛大故曰豐君子取離之明以折獄
取震之威以致刑折獄者決其辭而得其情致刑者
比諸法而當其罪噬嗑傳曰雷電合而章蓋陽氣震
發乃閃然成火故雷電止一氣而雷為主如爆杖然
火出而聲即透也

旅

山上有火蓋野燒延緣而蹺過者也君子明慎用刑而不留獄旅與獄皆非可以止之處王制曰刑者例也例者成也一成而不可復故君子盡心焉或曰觀六十四象獄起象終于中孚賁當聽訟之初雖守噬嗑之法猶无敢折獄懼乘快之濫也旅在中孚緩獄之前雖得豐之情猶用明慎懼淹禁之瘦也銑謂自旅以前聽訟也中孚死中求生必非怙終之賊仁心

如是民將无訟矣

巽

陣陣相繼故曰隨風巽申重也申命行事重複申明其命如風繼至既告戒之又丁寧之使人聽信然後見之行事民之從之如風之迅矣易巽主教命觀設教姤施命蠱振民夫巽之命可順者也命不順而以剛強行之難達已哉 申命必行事不然若令州縣徒掛牆間而已

兌

道不同則不相說兩澤相麗彼此相滋君子之有友
蓋同氣相求同志相資者也講習者講而復之或一
義而反覆紬繹或衆論而參比協合使理致明白工
夫真切則惟力以行之爾若獨學无朋則聞見孤陋
一曲之學一時之見自誤且以誤人論語首篇即曰
有朋自遠方來不亦樂乎

渙

風行水上則水散故曰渙夫天大无涯神氣无不在
人死而降魂氣无不之皆渙也享帝立廟合其散於
一壇一室也夫郊焉天神格廟焉人鬼享有所寓故
爾古者必立廟於東南祭享必以血易多象巽坎巽
居東南坎為血卦

節

澤者匯衆流而成水流至此而止不泛不溢謂之節
書曰大野既豬彭蠡既豬注曰水停而深者曰豬君

子制數度者因數而起之度如公量私量之類制之使平平則上下安分而不踰矣議德行者由德而行之行如隘與不恭之類議之使中中則知愚守道而不失矣數度者經世之制作德行者反身之修為制之議之皆節之義也

中孚

風感於澤而澤必應上感於下而下必應皆情之實也故曰中孚議獄緩死乃求其實情而矜恕之議獄

者若今矜與疑者上之大理讞之緩死者若今決囚
受其訴牒仍錮之再問禮王聽之司寇聽之三公聽
旬而職聽二旬而職聽三月而上之古之獄如為親
報讎殺人及功貴之屬有司皆不得專決夫人有血
氣必爭况所居之地所當之人所起之情參互伏匿
未易以聰察時日而得故擇人曰良臨審曰哀矜存
心曰敬有是三者當詳刑之任庶矣乎

小過

雷行天上其聲迅暴山上之雷震於高處其聲殷殷然但能過於澤上之雷而已行過於恭不為敖也若考父是已喪過於哀不為樂也若高柴是已用過乎儉不為奢也若晏嬰是已此三者過人之小節耳必也獨立不懼遯世无悶乃大過人之事論其極惟伊周之忠夫子之刪述足以當之

既濟

水在火上既能成亨飪之功然物極必反理數然也

君子處既濟之世知患之必生思而預防之治亂天
運也須人力支持堯舜有盛无衰能通其變也夫火
熾水溢反能滅火況有覆其釜者說者曰儲水防火
易之所患者坎險也非離明也

未濟

火在水上各居其所以順其性而不相資故曰未濟
聖人因法象之常以立義辨物如水火之有性居方
如上下之有別君子以慎行之察微致精物聚於類

方分以羣不相侵奪物者儀器用之品方者列等
適用之宜辨之者離之明也居之者坎之流也問曰
與同人之辨物何異曰同人別其所同也未濟致之
各異也司馬公曰未濟既濟反覆相承未濟君子以
矜慎之心辨物之宜處之有道如是則既濟矣他无
復為又當思未然之患而預防之是以君子康又民
物永保安樂者也 水火不交乃其常水火相交乃
其化

先聖贊易彖文隨文生解係辭以下兼明義畫惟
大象探卦象之賾示民用之宜雖剝爛夷誅可安
宅莅衆是故不待布筮列卦而能立已澤物雖用
三聖之文別發大道於乎其孔易也與程朱傳義
闡微挈蘊於象則畧諸儒求義於嘖乃或迂曲不
通銑日味聖言乃考諸家乃出臆見裁截敷衍綴
為一卷差若詳明可訓蒙士

讀易餘言卷三